



Odgodeno suđenje Velidu Hamdičeviću

Bivši konzul spreman na priznanje krivice

U toku pregovori o sklapanju sporazuma o priznanju krivice između odbrane Hamdičevića i tužiteljice Kajmaković

Saslušanje prvih svjedoka u predmetu koji se pred Sudom BiH vodi protiv Velida Hamdičevića, bivšeg savjetnika za konzularne poslove u Ambasadi BiH u Parizu, odgođeno je zbog mogućnosti da optuženi prizna krivicu za umješanost u trgovinu ljudima koju mu Tužilaštvo BiH stavlja na teret.

Obrana Velida Hamdičevića sa tužiteljicom Dianom Kajmaković pregovora oko sporazuma te se očekuje da bi se već do narednog ročišta dogovor mogao postići.

-Još ništa nije definitivno, ali očekujemo sporazum koji će odgovarati dvjema stranama u postupku - kazala je za Faktor Senka Nožica, braniteljica bivšeg konzula.

Hamdičević je optužen da je u periodu od decembra 2014. do juna 2015. godine kao službena osoba počinio koruptivna krivična djela, iskoristivši i zloupotrijebivši svoj službeni položaj, pa je u zamjenu za novac omogućio izdavanje dokumenata većem broju osoba za putovanje iz Francuske u BiH. Na taj način, tvrdi Tužilaštvo BiH, nezakonito je stekao više od 10.000 maraka.

On je, stoji u optužnici, članovima organizovane kriminalne grupe Elvisa Salčinovića, a koju su činili između ostalog i njegovi sinovi od kojih se neki prezivaju Hamidovići, nezakonito izdavao

putne listove za žrtve trgovine ljudima, što im je naplaćivao između 500 i 1.200 eura. Salčinović i drugi su potom organizovali lanac džeparoša, među kojima je bilo žena i maloljetne djece, a koje su prisiljavali na krađe po Parizu. Džeparenjem su "zaradili" više od dva miliona eura.



Optuženi Velid Hamdičević

Hamdičević je inače uhapšen u okviru policijske akcije „CD“ koju je u julu 2015. godine provela SIPA zajedno s istražnim organima Republike Francuske, a sa ciljem razbijanja međunarodne kriminalne grupe osumnjičene za trgovinu ljudima. Nakon hapšenja Hamdičević je pušten na slobodu uz mjere zabrane.

E. F.